

每週經課朗誦經文(巴克禮台語漢字)2014/03/23

共同經課 - 1

出埃及記十七章一節~七節

1 以色列人全會趁耶和華的命令，照路對對的曠野進前行，佇利非訂紮營。百姓無水通飲，百姓就及摩西計較，講：「互阮有水通飲！」摩西給in講：「恁啥事及我計較？啥事試耶和華啊？」3 百姓佇遐真嘴乾，愛飲水，就哀怨摩西，講：「你啥事導阮對埃及上來，互阮及阮的子兒，阮的精牲攏嘴乾死啊？」4 摩西就求叫耶和華講：「我對此個百姓欲怎樣做啊？in差不多欲用石頭擲我。」5 耶和華給摩西講：「你做百姓的頭前行，導以色列的長老幾若人及你去，你的手著抬前日拍河水的柺仔。6 看啊，我欲倚佇你的面前，佇何烈的石磐頂。你拍彼個石磐，欲有水對遐流出，互百姓飲。」摩西就佇以色列長老的面前按呢行。7 伊名彼個所在叫瑪撒，閣叫做米利巴；因為以色列人計較，閣因為in試耶和華，講：「耶和華佇阮中間抑無？」

共同經課 - 2

詩篇九十五篇

1 來啊，咱著向耶和華唱歌，向救咱的石磐出歡喜的聲！2 咱著到伊的面前感謝伊，用詩歌向伊出歡喜的聲！3 因為耶和華是大的上帝，是大的王，贏過攏總的上帝。4 地深的所在佇伊的手中；山高的山尖亦屬佇伊。5 洋海屬佇伊，是伊創造的；乾地亦是伊的手造成的。6 來啊，咱著鞠躬敬拜，跪落佇創造咱的耶和華的面前。7 因為伊是咱的上帝；咱是伊養飼的百姓，是伊手下的羊。今仔日恁若聽伊的聲：8 就毋通硬恁的心，親像佇米利巴，親像當日佇曠野的瑪撒。9 彼時，恁的祖公試我驗我，閣看見我的所做。10 四十年久，我厭恨彼世代的人，講：諸個是心迷亂的百姓，毋識我的路！11 所以，我佇受氣的中間咒誓，講：in斷斷袂得通入我的安息！

共同經課 - 3

羅馬書五章一節~十一節

1 所以咱已經對信稱做義，就對咱的主耶穌基督有及上帝和。2 也倚靠伊，對信來入佇現今所帶的恩典，閣向望上帝的榮光來歡歡喜喜。3 毋若按呢，就佇患難也歡歡喜喜；因為知患難生出吞悞，4 吞悞生出老練，老練生出向望；5 也向望無致到見諒，因為上帝的疼對所賞賜咱的聖神來灌沃咱的心。6 因為咱猶久軟弱的時，基督到期替有罪的人死。7 因為替義人死的，攏(oh)得有；替好人死的，豈採有人敢。8 若是上帝顯明伊本身疼咱的疼痛，因為咱猶久做罪人的時，基督替咱死。9 何況咱已經佇伊的血得著稱做義欲對伊得著救，免得彼個受氣啊。10 若咱猶久做對敵的時，對伊的子的死，得著及上帝復和；何況已經復和，欲佇伊的活得著救啊！11 毋若按呢，咱現今已經對咱的主耶穌基督得著復和，就對伊也掠上帝做通誇口。

共同經課 - 4

約翰福音四章五節~四十二節

5 對按呢到撒瑪利亞一個城，名叫敘加，近雅各互伊的子約瑟的地。佇遐有雅各的水井；6 耶穌行路倦，就按呢坐佇井邊。彼時約略日中晝。7 有一個撒瑪利亞的婦人來汲水，耶穌給伊講：「請互我飲。」(8 因為伊的學生已經入城去買物通來食。)9 撒瑪利亞的婦人給伊講：「你是猶太人，怎樣對我撒瑪利亞的婦人討水飲啊？」是猶太人及撒瑪利亞人無往來。10 耶穌應伊講：「設使你識上帝的恩賜，及對你講『互我飲』的是是誰，你的確求伊，伊就用活水互你。」11 婦人講：「主啊，你無汲水的器具，井閣深，對叨落有彼個活水啊？12 阮祖雅各留此個井互阮，伊家己及子兒及精牲攏飲此個井的水，你豈比伊卡大嗎？」13 耶穌應伊講：「飲此個水的攏欲閣嘴乾；14 獨獨見若飲我所欲互伊的水的永遠袂嘴乾。因為我所互伊的水欲佇伊的內面成做水泉，直直涓起來到永遠活。」15 婦人對伊講：「主啊，用此個水互我，互我袂嘴乾，亦免來即遠汲。」16 耶穌給伊講：「去叫你的丈夫才閣來。」17 婦人應伊講：「我無丈夫。」耶穌給伊講：「你講無丈夫是著。18 因為你曾有五個丈夫，今所有的毋是你的丈夫。你的話真正著。」19 婦人給伊講：「主啊，我看你是先知。20 阮祖曾佇此個山敬拜，若是恁講敬拜的所在應該佇耶路撒冷。」21 耶穌給伊講：「婦人啊，著信我。時欲到啦，恁敬拜父，亦無佇此個山，亦無佇耶路撒冷。22 恁敬拜恁所毋知的；阮敬拜阮所知的，因為拯救是對猶太人出。23 若是時欲到，現今就是，真實敬拜的，欲用神用真實敬拜父，因為父是愛此號人敬拜伊。」24 上帝是神，敬拜伊的人著用神用真實來敬拜。25 婦人給伊講：「我知彌賽亞啲欲到；伊若到，欲用一切的事給阮講。」(彌賽亞翻譯就是基督)。26 耶穌給伊講：「我此個啲及你講話的就是！」27 彼時伊的學生到，奇怪伊及婦人講話；獨獨無人講：「你欲甚麼代誌？」抑是講：「你啥事及婦人講話？」28 婦人隨時放下伊的水瓶，入城，給人講：29 「來看！一人我平素行的事，伊攏給我講，此個總無是基督啊？」30 in就出城，來就近耶穌。31 當時，學生求伊講：「拉比，來食。」32 若是伊給in講：「我有米糧通食，恁所毋知的。」33 學生就相及講：「豈有人互伊食嗎？」34 耶穌給in講：「行差我者的旨意，來明白伊的工，就是我的米糧。35 恁豈無講『猶有四月日就收割的時到』嗎？我給恁講，抬目看園，已經熟，通割啦。36 收割的人得著工錢，積聚五穀到永活，互撒種的、收割的相及歡喜。37 因為俗語所講：『此個撒種，彼個收割』，對按呢真正有影。38 我差恁收割恁所無著磨的；別人已經著磨，恁享受in所著磨的。」39 彼個城有撒瑪利亞人多多信伊，是因為婦人干證講：「我平素行的事伊攏給我講。」40 對按呢撒瑪利亞人就近耶穌的時，求伊及in住，伊就住遐二日。41 因為伊的話，來信的人閣卡多，42 給婦人講：「阮今毋是對你的話來信，是親身聽見，知伊真正是世間的救主。」